

■ COLUMNA

Per in avegnir dals meds da massa rumantschs

DA MARIANO TSCHUOR

I 981 ha l'Institut de Cuors internaziunals Retoromontschs, il precedur da la Fundaziun Retoromana Placi a Spescha, publictà «Il program de Rumein» e quai en connex cun il studi «La mort dil Romontsch» da Gion-Giachen Furer. Quest «Program de Rumein», inspirà fermamain da p. Flurin Maissen, ha servì alur als responsabels da la Lia Rumantscha da formular lez onns lur politica da linguatg, postulond la «normalità» dal rumantsch en tut las domenas da la vita publica. E vairamain: Il concept ha gi in bel success, il rumantsch è entrà en la vita da commerzi, da reclama, da la scola sin tut ils stgalims, ha gi ina preschientscha naziunala da smirvegl ed ha chattà ses da chasa finalmain en constituziuns ed en leschas federalas, chantunales e communalas. Era sch'il «Program de Rumein» pretenda bler dapli (università rumantscha, programs cumplains dal di per radio e televisiun etc.) astg'ins bain constatar oz ch'el ha gi in effect inicial da gronda muntada ed impurtanza.

Sco ditg: na tut ils postulats e desiderats han chattà la voluntad politica per vegnir realisads. Ma en ina domena statti bain cun ils Rumantschs: ils meds da massa. Quai è era d'engraziar ad ina politica suverana e coerenta dals responsabels da las organisaziuns rumantschas e da la deputaziun grischuna a Berna els onns 80 e suandants. En cumparegl cun autras cuminanze linguistics minoritaras en l'Europa san Rumantschas e Rumantschs sa servir oz d'ina bella purschida audiovisuala e da texts en

rumantsch. Era sche la gasetta da la giuventetgna rumantscha «Punts» è svanida 2012 senza che vuschs uffizialas avessan deplorà quai, avain nus oz anc adina Ina «Pagina da Surmeir» che cumpara emnilmain ed ina «Posta Ladina» cun contribuziuns rumantschas. E di per di, da glindesdi fin venderdi, cumpara La Quotidiana. Quai è dapli che mo remartgabel, quai è sorprendente. La cumbinaziun raschunaivla da lavur tranter l'anr, l'Agentura da novitads rumantschas e la chasa editura Südostschweiz, pussibilescha in product schurnalistic modern cun l'accent spezial sin la regiun. Che RTR Radiotelevisiun Svizra Rumantscha astga contribuir di per di cun novitads curtas al cuntegn da La Quotidiana è in mussament d'ina collavuraziun raschunaivla tranter la SRG SSR ed ina chasa editura privata.

Questa collavuraziun sa vegnir intensivada. RTR ha – en accordanza cun sia societad purtadra la SRG.R – postulà repetidamain ina collavuraziun tranter quellas organisaziuns ed instituziuns che produceschan texts rumantschs e contribuziuns per la pressa, per radio, televisiun ed internet. Il martgà rumantsch è pitschen e survesaivel. Ina concorrenza commerciala n'exista betg. Las funtaunas schurnalisticas, la basa per scadina istorgia, saja per la pressa rumantscha, saja per RTR, èn las medemas. Tant la pressa sco era radio e televisiun han sco chasas da medias rumantschas in'incumbensa supplementara a lur primara, che è il schurnalissem, numnadamain quella da contribuir ad ina identitad, gea perfin ad ina schientscha rumantscha.

RTR ha mess sin maisa il concept «Content Rumantsch» ed envidà l'anr, las chasas edituras a San Murzezzan ed a Cuir e l'editura da la «Pagina da Surmeir», mo er il chantun e la Lia Rumantscha da sa participar ad in svilup dals meds da massa rumantschs. Era sche la resonanza è stada modesta èn RTR ed SRG.R persvadids: Quest svilup è necessari. Sche la forza umana e la voluntad politica n'èn betg ablas da far quai, la tecnica e la tecnologia moderna pretendan quai da nus. Il mund digital è en cumplina dinamica. Jau legel minga damaun las gasettas sin mes iPad. Era La Quotidiana. La pagina d'internet www.rtr.ch dumbra da mais tar mais adina dapli consumentas e consumers. Ils films curts sin nossa pagina per la giuventetgna battaporta.ch chattan in fitg bun eco. Il mund digital pussibilescha a nus gia oz da recepir texts, maletgs e tuns cura, co e nua che nus vulain.

La schanza d'ina minoritad culturala e linguistica è quella dad esser proactiv, agil ed innovativ. Tschert, betg tutta innovaziun è il salvament. Dentant savain nus era che manchentar il svilup sa esser la fin d'insatge. Ils meds da massa rumantschs èn bain en gamba, han ina solida savida en producir e derasar products schurnalistics e disponan d'in bel dumber da persunas engaschadas. Ina grondiusa basa da partenza. La tecnologia digitala, il mund dal word wide web, pretenda, gea sforza nus da concepir uss da nov noss'offerta publicistica rumantscha. Quest concept stuain nus far e realisar uss da cuminanza – betg en concorrenza.